



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Ukraine nem US air defence systems agütsütsü: Trump

Odei Onaindia-i club toktsüogo

VOL. XXII ISSUE NO. 267 (ADOK 267)

DIMAPUR

KÜPTOKNÜ (SATURDAY)

CHITENI (JULY) 12, 2025 ₹ 5.00

AB PM-JAY aser CMHIS kübok mozüki asem tanaben empanelled asür

Dimapur, Chiteni/July 11 (TYO): Ayushman Bharat Pradhan Mantri Jan Arogya Yojana (AB PM-JAY) aser Chief Minister Health Insurance Scheme (CMHIS) kübok mozüki asem tanaben empanelled asüba osang ka Nagaland Health Protection Society (NHPS) ajanga July 11, 2025 nü metetaksüogo.

Item mozüki asem ya Eden Medical Centre, Dimapur; Olive Christian Hospital and Research Centre, Dimapur aser

Bethel Medical Centre, Kohima alitsü.

Nüburtemi item mozüki nungi AB PM-JAY aser CMHIS scheme tem kübok cashless treatment agitettsü, ta CEO, Nagaland Health Protection Society, Thavaseelan K ajanga sangdong ka nung metetdaksü.

Metetpelatsü mesüra osang tejangja metetner temi Toll-Free Helpline No. 1800-202-3380 ajanga tongteprateptsü akok.

MP S. Supongmeren Jamir-i terenlok mapa asadanga jajar

Dimapur, Chiteni/July 11 (TYO): Hokulbarnü Member of Parliament (Lok Sabha) aser District Development Coordination and Monitoring Committee (DISHA) indang chairman, S. Supongmeren Jamir-i DISHA nükjidong rateta ashi aser Centrally Sponsored Schemes (CSS) tem ochishia, shidak mapa kuma inyakba aser ketdangsüba nung tongtipang shilem agir ta ashi.

Wokha nung DISHA senden ka amendang, senotsü lemsaba nung meputepba, project mapa kuma inyakba nung menuba aser on-ground challeges tem shidak asadangtsü nüngdakba indang tebilemtsü pai lemsatepa liasü.

Paisa public service delivery channels tem tajungba akumtsü tongtipang ta ashi aser department balala dang item schemes ajanga nüburtem ajangzükdaksütsü ayongzüka liasü.

Iba senden nung tongtipang department temi inyakym balala indang presentation agüja liasü.

Senden nung central ministries dang senotsü tali agütsütsü, talisa project tembanga inyaktsü asoshi senotsü agi meperi aliba atema tali meshitsü pangjema liasü.

Teka amteper ochishia terenlok maparen takok ngua inyaktsü DISHA tangatetba lir ta MP S. Supongmeren Jamir-isa ashi.

Mon nungi senzüsemponger nem Assam Police-i timtem agütsüba aitsü

Dimapur, Chiteni/July 11 (TYO): Mon district nungi nüburtem Assam nung aliba highway ajanga senzüsempongba mapang timtem balala ajuruba tebilemtsü lemsatepa Konyak Union-i Hokulbarnü Nagaland Chief Secretary nem tezüluba ka agütsüogo.

Kaketshir, shiranger aser shishilempartem densema tai maket senzüsemponger tem dang Assam Police-i menüngdakba asüngdangyaa, tapi agi meita aor aser merenshir, ta Union ajanga shiti nung shia lir.

Parnoki yamaji inyakba ajanga Mon district nungi nüburtem nem timtem balala agütsür, shirnok temang anepalutsü, education, employment, business aser danga tongtipang nüngdaktep atema item lenmang nung metaloka lir, ta Konyak Union ajanga ashi.

"Iba ama inyakym yagi state balala tsünta yimjung aser tesunep nung aliba yimya nung aibelenba kisüing masü saka asen nüburtem indang fundamental rights, talisa 'right to free movement and dignity' nung aibelener, ta shiti nung ashi.

Anungji Nagaland sorkari tematiba jenjang nung teka amuoka Assam nung tapet ketdangsür den iba ken o benoka jembia tapi agi kuli tejangja makai tim masüba mapa inyakba tekeraba nung anendaksütsü asoshi ayongzüker, ta Konyak Union ajanga ashi.

Union ajangasa Mon nungi senzüsemponger nem mapang shidak nung teyari agütsütsü asoshi 24x7 grievance redressal helpline ka tenzüik nung ajungtsü, ta parnoki ashi.

State sorkar dak tamang akar aser Mon district nungi nüburtem kumzüka ayutsü mechi iba ken o süoki ia agütsü imlar, ta Konyak Union ajangasa ashi.

MP Rajya Sabha S. Phangnon Konyak lenisüba nung FCI senden amen



MP, Rajya Sabha, S. Phangnon Konyak aser ketdangsürtem July 11, 2025 nü Hotel Acacia, Dimapur nung Food Corporation of India indang State Level Consultative Committee senden amendang tangokba noksa ka yangi angur.

Dimapur, Chiteni/July 11 (TYO): Member of Parliament (Rajya Sabha) aser SLCC, FCI mendenpula, S. Phangnon Konyak lenisüba kübok tanü Dimapur nung Food Corporation of India (FCI) indang State Level Consultative Committee (SLCC) meeting ka mena liasü.

Iba senden nung Food Corporation of India ajanga digital temelenshi agizüksü merangba nung shilem tajung agiba asoshi S. Phangnon Konyak-i pelaba lemsatepa liasü.

Artificial Intelligence putu ka nung dangar memenepi malitsü asoshi online nung maparen inyaktsü ya kanga tongtipang kumogo, ta ashi. FCI app aser online portal sayar maneni amshiba ya kanga junger, kechiaser iba yagi jang o tzü lema agütsüba nung tali ochishia inyaker, ta lai ashi.

Nagaland nung jang o tzü teti peria alir aser Government of India-i Nagaland nüngdakba peria jang lezmüksür, ta MP Rajya Sabha, S. Phangnon Konyak-i ashi.

FCI yagi talisa Social Welfare

Department küboki aitiba jang aser wheat-based tem ketdang asür ta jangjatsü.

Lemzüksüba jang o tzü noklang shilem bener arutetba ajanga state sorkar aser FCI ajanga supply chain kanga junga ketdangsüba sayur, ta Konyak-i ashi. State tesem ajungalen beneficiaries tem nem lezmüksüba jang shidak anguba osang lir, aser ibaji ajanga maparen shidak inyakba sayur, ta ashi.

Konyak-i FCI inyakym nung tenünsang agütsü aser beneficiary ajunga nem pei tata shidak lezmüksütsü asoshi ochishia aser mapa takok ngua teka amteper inyaktsü nüngdangba nenshia ashi.

Iba senden nung shilem agirtem dang maneni Department of Food and Civil Supplies indang teinyaktsü dak sendakba nung awareness tali agütsütsü ayongzüik. Mapang shidak nung jang o tzü belena ajak nem kasa lemsaja aser stocks aser jenjang tem mapang shia asadangtsü department mapa lir.

Senden nung FCI nükjidong

aser inyakym, Procurement and distribution systems, Food security scheme balala, IT inyakym, Preventive mechanisms, Nagaland Region nung FCI operations aser Nagaland nung food security atema FCI ajanga inyakba indang PowerPoint presentation tejangja agüja liasü.

SLCC ajangasa Procurement and distribution of foodgrains, Quality of foodgrains, Storage of foodgrains, Transit and storage losses, Interface of the FCI with the State Government on functioning of the Targeted Public Distribution System (TPDS) including allocation, offtake, Actual distribution of foodgrains for Antyodaya, BPL, aser APL families aser Central mesüra State welfare schemes, Sale and disposal of stocks, aser Ministry of Consumer Affairs, Food & Public Distribution mesüra FCI ajanga tuyuba ama inyakba maparen jangjatepa liasü.

Kasa mapang iba senden nung shilem agirtemi mangatetjembatem state sorkar aser FCI nungi jangjashia liasü.

Assam private hospital nung tasü mang ghonda 2 dak tali mayutsü: CM Sarma

Guwahati, Chiteni/July 11 (Agencies): Assam nung aliba nija mozüki tem nung shiranga asür temang anepaluba bill kinunger temi memonokaka tasü mang ghonda ana dak tali ayutsü memelatsü, ta Chief Minister Himanta Biswa Sarma-i ashi.

"Nija mozüki tem nung nisung tasü mang soita ayuba malitsü. Senotsü agüjang-tagütsü, tasüba kulizüing agütsür ghonda ana tsüingta tasü mang agütsütsüla. Iba mapang alemba atema temerenshi alitsü," ta pai Brehostibarnü cabinet senden ka amenba sülen osangbener dang ashi.

Paisa sorkari 24x7 toll-free helpline number - 104 amshitsü aser yangji mangyimer temi pei adianu asüba tasü mang magütsüba

osang agütsütsü tashi.

"Memonui iba ya District Health Officer, local police aser hospital grievance cell tashi atutsü. Osang angazükba sülen nunglokja aliba ketdangsüri osang aruba tesem semdangtsü aser tai nung soita yua aliba tasü mang agütsütsü aser ozüing agi melaba maparen tenzüksü," ta Sarma-i ashi.

Aibelenba aliba mozüki indang license ita asem nungi trok tashi soita ayutsü aser senchi sen 5 lakh tashi achitsü aser maneni aibelenba putetra teti atema deregistration asütsü, ta ashi.


"Assam nung private nursing homes temi tashiyim mapa amshiba nungi nokdangtsü asoshi cabinet-i draft Standard Operating Procedure (SOP) aser regulatory guidelines tem agizükogo. Iba ama atalokba ya

police aser district health authorities nem ghonda pezü tsüingta metetdaksütsüla," ta pai ashi.

State cabinet-i district ti - Goalpara, Udalguri, Nagaon, Baksa, Sonitpur, Golaghat, Jorhat, aser Biswanath asoshi 'Gaja Mitra Scheme' agizükogo, kong nisung aser shiti raraba tali ataloker, ta Assam CM-isa ashi.

Iba scheme kübok kongshia aliba yimtsüing shia nung yangji aliba nüburtem ajanga volunteer team ka tentettsü. Item telok yagi repranga atatsü aser yimtsüing telungi shiti aitiba mapang tekeraba nung telangzüba agütsütsü. Team shia nisung ti alitsü aser parnok ya ita trok atema tesem 80 nung alitsü - iba ya alu nung mo ainba mapang lir aser iba mapang tali ataloker.

World Population Day mungogo



Dimapur, Chiteni/July 11 (TYO): "Healthy Timing and Spacing Between Pregnancies for Planned Parenthood" ome nung ajemdaker July 11 nü District Health Society, Department of Health & Family Welfare, NHM den külemi CMO indang conference hall nung World Population Day mungogo.

Iba sentong ya DPM, Avikali Jakhalu lenisüba nung agi aser DPO (RMNCAH+N) Dr. Khrievillhou Nakhro-i, July 11 nungi 18 tashi "World Population

Day & Fortnight" amungtsü aliba ya koda tongtibang iba indang lemsatepa liasü. Paisa, Mission Parivar Vikas kübok SAARTHI ON WHEELS" den Family Planning Choices method indang lemsatepa liasü.

Kohima District kübok block aser yimtsüng ajak nung advocacy aser awareness campaign tem ayongzüka agitsü, kong Family Planning methods, contraceptives amshiba aser tanga spacing method tem, kibong akümtsü

atema atasatsüba, mezüngbuba tanur asoba, client tem counseling aser IUCD & PPIUCD Insertions, Condoms, Tubectomy & Vasectomy amala Family Planning services tem agitsü atema temsüa aliba apuanitem ajungmesotsü aser HIV/AIDS dak sendakba nung tangazükba agütsütsü densema lir.

Iba sentong benoka inyakba mapang nüburtem nem, tanur asoba tsüngda tawa ayutsüba, post partum family planning, family planning nung teburtemi shilem agiba aser post abortion family planning indang tangazükba agütsütsü.

Maneni health unit teshimtet kar nung lokti sensaksem sentong ayongzüka agitsü aser Family Planning Media Campaign tasenba den peta pamphlets, leaflets tem maloktsütsü aser tongtibang tesemtem nung banner aser poster tem toktsütsü.

Forest Guard trainee temi tesem balala semdang

Dimapur, Chiteni/July 11 (TYO): Forest Guard trainees temi Krishi Vigyan Kendra (KVK), Dimapur, ICAR Research Complex for NEH Region, Nagaland Centre, aser National Research Centre on Mithun (NRCM), Medziphema semdangogo.

Vermicomposting, Integrated Farming Systems (IFS), organic aluyimba, animal husbandry, aser süngjanglijang aser aonsotsü processing densema sustainable agricultural practices dak sendakba nung tajangshiba aser tangazükba agütsütsü nükjidong nung iba sentong ayongzüka agiogo.

Sentong nung Senior Scientist & Head, KVK Dimapur Dr. Phool Kumari-i lokti pela agizükba o jembi. Lai, KVK-i sentong balala benoka inyakba indang metetdaksü aser iba ama tesem balala semdangba ajanga shisatsü tali agütsür aser mapa balala benoka inyaksü asoshi tasa tajungba kümdaksür, ta ashi.

East Dimapur Town Council-i metetdaksür

Dimapur, Chiteni/July 11 (TYO): East Dimapur Town Council-i sangdong ka ajanga, East Dimapur Town Council kübok highway aser lenmang nung amenoka aliba commercial establishment, institution, bank tem dang 2025 küm Nobember 30 nü tashi nungbo parnoki mekazüker aliba kidang lendi shia aser ki telung shia Closed-Circuit Television (CCTV) camera tem amenoktsü metetdaksüogo.

Nüburtem kümzüka toktsütsü, özüng alema inyaksangshirtem nokdangtsü aser jila nung temzüng özüng shitak benoka inyaksü atema teyariagütsütsü asoshi iba

Director of Safety Dr. Rajesh Kumar-i, aluyimba aser forestry sectors ajangzükdaksüba sustainable, eco-friendly technology tem ajungkettsü koda tongtibang iba indang jembia liasü.

Kasa mapang nung Dr. Aabon Yanthan Scientist (Fruit Science)-i, fruit crop processing dak sendakba nung technical session ka katsü aser trainee tem nem süngjanglijang aser aonsotsü Processing Unit indang metetdaksü, kong parnoki value addition techniques aser post-harvest management indang angazüka liasü.

Jyotish Barman Scientist (Fishery)-ia, Integrated Farming System (IFS) models indang metetdaksü aser iba sülen ICAR Nagaland Centre nung demonstration farm semdanga liasü.

Dr. Ebibeni Ngullie SMS (Animal Science)-i, an, azümongshi, ak aser nashi metsüba densema nimal husbandry inyakyimtem indang

metetdaksü, aser iba den parnoki yimdakyimtsüngtem nung shilem balala agiba indang lemsatep.

Maneni Dr. Akshay Ujjwal SMS (Agronomy)-i vermicomposting aser organic farming dak sendakba nung tangazükba agütsü. Imliakum Pongen (Farm Manager)-i vermicompost renemtsü tatongi sayua liasü. KVK Dimapur-isa, Department of SEFTI nem vermi pit ka agüja liasü.

Trainees temisa National Research Centre on Mithun (NRCM), Medziphema semdangogo, kong sü dak sendakba nung scientific management aser conservation strategies indang parnok nem tangazükba agütsü.

Iba sentong ajanga Forest Guard trainees 32 ajangzüko. Dr. Bendangla Imsong SMS (Plant Breeding & Genetics), Dr. Chingakum Sima Chanu, SMS (Home Science) aser Dr. Moanaro (Programme +Assistant) nunger densema SEFTI, Dimapur ketdangsürtem aser KVK staff temia iba sentong nung shilem agia liasü.

Pongen kidongi HSLC nung takok angurtem tushi

Mokokchung, 11 July (TYO): 4 buba Tongpok Semchir Pongen Mungdang (TSPM)-i NBSE kübok HSLC tatidang agiba nung Pongen kidong nungi tangar dang alakteta tematiba jenjang (top 20) nung züngokertem nem tetushi agütsüba "Academic Excellence Award 2025" sentong ka 11th July, 2025 nü parnok TSPM Kimen Aongza Ward, Mokokchung nung meraketa agiogo.

Taküm Pongen kidong rongnung kaketshir par aseme

Tepela Lemsapter



ASO:8-4-1963 | ASÜ:6 -7-2025

Onoki teti meima aliba ojala **MEYITULA (Molungkimong)** shirangba anogo nungi tasünü tashi ana aser talang nungi yimtsür-yimer, arogotem, kidang-kiyonger, medemer aser temeimer shirnokisa özü den temeim mapa balala ajanga yaritepogo, nenok ajak dang onoki kanga pelaba lemsateper. Nenok temeim mapa tajung asoshi asen Tulusang Tsüngremi meyiper moatsütsü özü tamang sarasadem.

Maneni item kija aser lokti dang mejeta pelaba lemsateper:

1. Dr. Imsulemba, Lenjem Hospital Mokokchung & staff.
2. Molungkimong Senso Telongjem & Fellowship, Mokokchung.
3. Molungkimong Senso Telongjem & Fellowship, Tuli.

Temeim Kinungbu, Chirnur aser Kinungertem.

NBSE compartmental tatidang result July 16 nü sangdongtsü

Dimapur, Chiteni/July 11 (TYO): Nagaland Board of School Education-i sangdong ka ajanga, NBSE-i ayongzüka agiba HSLC aser HSSLC Compartmental & Improvement Examinations 2025 indang provisional results July 16 nü adoktsütsü ta metetdaksüogo.

Results indang soft copy Board indang portal (www.nbsenl.edu.in) nung angutsü. Candidate temi NBSE portal nungi parnok indang provisional marksheets download sütettsü.

Board-i, Centre

Superintendent tem nem July 18 sülenang documents agütsütsü. Centre Superintendent-i iba ya agizüka pa/la kübok aliba Centre tem nem lemtsütsü. Centre Superintendent ka marutettsüsa kümra pa/lai documents tabeni aoba Centre Superintendent ka dang pa/la tenüng nung documents agizüktsütsü atema temelaba agütsütettsü.

Iba dak sendakba nung Centre Superintendent ajak dang iba anogo temulung dang yur document agizüktsü mepeshia metetdaksüogo.

Chuchuyimlang, school - Mount Mary Hr. Sec. School, Chumoukedima.

Takoker par asem nem senpet sen 10,000/- den nünyu kulikaket kaka senpettsüogo. Par asem rongnung Sb. Moasanen Pongener ang tsüngdong arua sentong nung shilem agia tepela o lemsatep. Kr. Mereninla Pongen aser Kr. Chubakala Pongen nabo medentet saka temeyonger kar arua tetushi senpetji agizüka liasü.

(Maneni Tapak 8 nung)

July 16 nü Yemen nung Kerala tsür ka nem tasüba temerenshi agütsütsü

New Delhi, Chiteni/July 11 (Agencies): July 16, 2025 nü Yemen linük nung Kerala tsür nurse, Nimisha Priya nem tasüba temerenshi agütsütsü lia la kinüngbu, Tomy Thomas-i teimla

mesamar, ta metetdaksü. "Ni Nimisha den tongtepratepdar. Ni Centre aser state sorkar den külemi ministry of external affairs dak tamang akar. Advocate-i akokba tashi

ajak inyakdar," ta metetdaksü. Nimisha ya Kerala kübok Pallakad district nungi lir. Yemen nung lai la business partner tepset ta la nem tai tongloktsüba sülen 2020 küm iba ken o nung la aija

la nem tasüba temerenshi obendang agüja liasü. Tang la Yemen yimtiba, Sana nung aliba jail ka nung puoka lir. La kümzüksü atema Yemen ketdangsertem den jembitsü asoshi Centre sorkar nem

tetuyuba agüjang, ta Supreme Court nem temepishiba ken o ka agüja lir. Ajioda July 14 nü Justices- Sudhanshu Dhulia aser Joymalya Bagchi nati temepishiba ken oji angadangsü.



Viksit Bharat ataloktsü atema Yuva Shakti tashi itshia inyaker



Rozgar Mela kubok Ato Kilonser Narendra Modi-i

**Linük tesem balala nung tesem 47
nung ayongzükbä sentongtem
nung shimteta aliba Candidates nem
Appointment Letters 51,000 dak tali lema agütsütsü**



Honibar, July 12, 2025



Anepdang 11:00 ako

(Video Conferencing ajanga)



Central sorkar den state sorkartemi senteper maneni mapa maongka tasen adokdaksür



Talisa tetsürtem, Divyangjans aser District balala nungi tejangrar candidates-i tajangzükbä aika angutsü



UPSC, SSC, Railway Recruitment Board aser IBPS ama nüngtugu agency tem ajanga mapa nung shimoktsü



Kasa maongka agütsütsü atema regional oshi 13 nung recruitment exams agitsü



Sorkar mapang inyaker crore 1.21 dak temai i-GOT Karmayogi Portal nung aliba high quality courses 2800 nungi training agir



Mapa tazüng maneni reprangteta online system ajanga mapa nung shimoker



Mapa nung shimokba inyakyim teladak asütsü atema inyaker; Paper leaks anema ozüng tesashi benoker



Iba sentong ya DD News
nung Live reprangang

Training dak sendakba nung osang tejangja metettsü atema Karmayogi Module indang website <https://igotkarmayogi.gov.in> nung reprangang mesüra agüja aliba QR Code ya scan süang





TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 12, 2025

Dimapur nung Senden Reju

Dimapur nung Ao kin telong junga sendener külem yimten sabang aser tamangba tsütsüa arok meyong arogo tentet aser yimputsür yimpur samanirtemi yimkong nungdak nung amshitsü atema mulungsua ali ajir majjem tenla agütsü nung, yangji Aor inti adenshia senden reju mesemtet aser iba senden rejuji Dimapur nung alir Aotsür Aortem adenshia alima asoshi tajung inyaksü kenbang obang medemdak aküm. Joko, Tsüngremisa meima maotsürji, taoba küm ishika tsüngda Dimapur lima Aor nütsüng tenük sünga züindaktsü. Ibayongji, yimten, lokti aser arogo nung lenirtema teinyaksü wadang aser khuret tuluba aküm aser temoatsü aser maongkaa jenti ajuru. Aorji Aor, temeim aketba Samanir telok, anungji Ao Senden Rejuji Aor kisüng ajungtsü jembidak sabang ka masü saka Naga nunger inti ajungtsü bilema jembidak Tsüngrem sabang ka ama kümadokogo. Ibayongji, Senden Reju tuluba ka nungdaka aküm aser lanu asensor tajung alibayong parnoki yimkong khuret tongzüka, ano, Senden Reju tasen tuluba ka renemer tanü semzüker. Atangji, iba mapa nung lanurtem mulungsu mapa nungita Aor yimten yimsüsür, takar, tulus aser nütsüng nübor ajaki pei akok yaritepba agi mapa takok nguogo. Joko, Chungliyimti nungi Dimapur lima tashi Ao lima mesemteta aodang, Ao li tekong Mokokchung district nung aliba nütsüng dang nungibo teimba asütsüsa Dimapur lima züindagi. Ibai Tsüngrem taochi aser temoatsü lir. Aji oda, kong lidir liaka temoatsü den asen shilem teinyaksü mapa dena arur, anungji asenoki temoatsü dang agir toktsütsüba masü saka asen alidak külem lisemertemi Aotsür Aortema ya junger ta ashitsüsa asenok alitsüba kanga tongtibang kümogo. Laishibai ashiba ama, hon taribi aser senti osettem dang nungibo tenüng tajungjisa tajungba ta asüba nung asenok Aotsür Aoertemi mapa küma amangtsüla. Aji oda, Aor nütsünga teimba saka parnok meputep, parnoksa morumoru tasüba, parnoksa ochimashiba ta asüba nung tamajung ta asenoki angatetra, asenoki tenüng tajungbaji shimtetsü. Kasaji. Aorsa takarba saka parnok akabaji mashilen nungi bendenba agi akabattem ta tangari jembitsüsa lira asenok Ao kin asoshi tenüng tamajung, anungji asen akaba aser uluba nungji asenok asoshi akhüm mali aser tashia mali akümtsü. Aji oda, Aorbo ochishir, taremsük, temeim aketba nübor, nendaka aser meranga inyaker aser parnok kolok aser shisatsü agi tangar asoshia len tajung piboka anir ta tangari jembitsüsa asenok litetra, iba tenüng tajung jagi asenok arentsü aser asenok atutsü. Joko, asenoka alima tasen mesemteta senden reju tasenba nung adenshia shisalemsatet dangbo asenoka shisatsü aser tokolok ulushir asen alidak asenoka senso küma alitsüsa khuret bentetsüla. Aji oda, Dimapur lima tajung mesemteta senden reju yanglua yur, oagi asenoki toktsür aruba tsürabur lima nung alirtem indang shilemang lemsaa agitsüsa bilemra, asenokji parnok yarir masü saka parnok timtemdaksür rogoang kümadoktsü. Aji oda, yimten tsütsüa senden reju dang masü saka Dimapur nung teti alitsüba ali kimong mesemtetba kiojena yanglua ayu, saka election asoshibo oagi toktsür aruba asen tsürabur lima indangang bilemer ta süra, asenoki asenok alidakbo tangar nem amoksepdaksür saka oagi asen malidakang asen adianutem nem timtem agütsür ta asüba pur akümer asütsü. Joko, asen tsürabur lima toktsür aruagi alima tasen mesemteta senden reju yangerteta alitsü tenzüker süra, Dimapur nung alir Aotsür Aor shingaia Dimapur lima ya bendang lima ama mebilemi, Dimapur senso ama bilema Dimapur asoshi tajung inyaksü bilemtsüla. Aji oda, Dimapur nung aliba government lenmang, government schools aser colleges, government office-tem, stadium, play ground, park aser bazaar ajakji asen meyong ta bilemtsüla. Yangji anakawa endoka alinunga shia endokang, timtemer lira yariang, mapa tajung inyaksü reprangteta jet ta inyakadokang aser tai kar reprangtetra metongshijang. Aji oda, Dimapur nung Aori Aor kija atema bilema inyaksübo wadang ilara aser aji atema asenok Dimapuri anir aruba masü. Iba tangatetbaji Senden Reju nung jembia asenok kenbang obang medemer Naga nunger inti ajungtsü atema asenoki olaa adoktsüla aser teinyaka inyaksüla.

OLEMSABANG

Sobaliba Libaliru Tamajung Kar

P. Renthly Jamir.

Asenok sobaliba tajung aika benshia aru saka yangi item tajungtemji mezülur saka sobaliba tamajungtem aser lia arudang benshiba libaliru tamajung aika rongnungi kar shimteta zülur.

Mezüngbuba nung sobaliba tamajungtibaji Aori alar ayuba Tsüngremi nisung ajak Pa mesükba nung kasa yanglu ta memetetdang kin kar kari alar ya ayu. Saka Aor alar ama shingaia mayu. Asenoki tongtibangsa sayutsüngertemi negro nunger alar reshikangshiba arokaroka jembir. Negro nunger alar indang Bamber Gascoign-i pa kaket "The Christians" nung yamai zülua lir, parnokji shiruru dang temaba saka meimchir dang tekübokba. "The Negro slaves who were widely regarded as above beasts but below human beings." Aori alar ya tapu ana ayu. Kabo sentsüh küptoka ayuba ajibo tepsettsü makok, ayoktsü makok. Saka alar chichiba koba dang Henlidaklar ta ajar ajibo shiruru den kasa ayoktsü, lepsettsü akok. Kechiyong item alarji shiruru den kasa shitak ta kuli asütsü ken ka bena arudi.

Oh jungshi Longjang küna jungshi

Ayim semer nükshia

Nangla Atayangla benro

Nila Mer süpong kiro.

Yim kati alartsür Atayangla agütsü kati sü ka agütsü. Aor alarji shiruru den kasa, negro nunger alarbo yamaji masü. Iba sobaliba tamajung ya British government tashi tulu agi nokdang saka onok tanur asüdangtashi parnok tsürabur yabo alar asüba alar chir, alar semchir ta teptsü matep süpeti, langtema süpo temesüng agir angu. Alar anogo tepiyong alu inyaksü aonung amua mao kümpa ka-a angina tsük sena sangwatsü, kar anünüa lira kiburi pa/la ayipdak süng talangka yua lir aji agi zükoktsütsü, chi aon talem magütsütsü. Alima otsü nung alar ayuba reprangdangra Hindu nunger kari alar ayubaji parnok tamangba yimsü kaket agi aitsü. Anungji Tsüngremi nisung ajak kasa yanglu ta aochia meima Manumission ozüng amshia benshi. Manumission tetezü alar nüchi küma chiokba (To set free from slavery). Yamajisa Muslim nungera Islam law (Sharia) nung kasa Manumission ozüngji benshia non-Muslim alartemji meima benshi ta ashir. Ano Lai nung Israel nunger alar reprangdangra Levi:25:39 pei nüburbo talizükba alar ka ama mekümdaktsütsüla ta shia lir. Ano Taz:15:12 nung Ibri nungerbo talizükba lar asüyonga küm trok yurbo chiokang ta lir. Aser Tasen Lai nung Pauli Filemon dang Onesimaji alar ka ama masü adianu ka ama yuang ta zülua lir. Tangarbo pei zü pei nisungbo alar mayu. Aor pei kin nisung dang masü yimeri yimer alar ayu aser alarji shiruru ama ayu. Aser aji shitak ta kuli jangjabaji tanü Revival tialong mapanga Mokokchung len Kohimalen asenok Aor Aotsüri kilir dak azükba zübutem tosa angudang kuli asür.

Tanabuba sobaliba tamajung kaji alima nung sen maka tsük dang aser apuba yimyaji principle dang chidong interest dang tetemlok ta aja. Aser takari sensaker khenyongi maochi tetemlok tali tapong meshi, yim kar nung yimchi 5 nung tetemlok yimchi 5-10 meshi iba ya ita ishika atema yim kar nung yimchi 6 nung yimchi 4 temloker 10 atak. Aser iba ya tsük tamajung koba dang pitsükpishi ta ajar tsüksü tesa aji dang belentepa ataktsür ano sensaker nübu taahji onsara ajema agütsür. Nübu ana nung tsük pua ka aji yimchi tesadang jang seret ana dang senteter. Aor sobaliba nung sensakerji Molumi, takar kasa akar aser Tsüngrem memetet nungji takartemi sensakertemji tesensaknü agi sensaker ama o tamajung tebang angüma ashir. Rev. Toshi Langui takari tetsü parnok mezüngmeshiba ken teti atenba ya yazü purapujia atenba masü. Tsüktem agiba agi tebok masünger taah aobajagi chiko majung pei lu inyaksübo khenyongi mapang madoker. Ano sobaliba tamajung kaji mongtem mongtsü tali alui aolen maka kenüamati amongtsüsa, Sensaker tiabo alima nung masoang tajungba ta liasü.

Tanü nisung aikati lanurtem ajungshidang Ao sobalibabo ajak tajung tesa, libalirua aru ama jembir, ochishir tesa, auer mali, azümesener mali, nüktapangtar balalur mali, Kotak lima ama liasü ta bangpet süa jembir. Item jembiba jagi alima memelenshitsü.

1. Balalular onsara tali liasü, tetsüra tebura pongu trok den balar tanur teimba tetsübo ka tebubo balala tebubo ka tetsübo balala, ano anepdanga aonunga kinungtsü o kinungbu na teptepba manen kibong aika liasü. Raratepbaji kecha maaksü maikoï ka ama mebilem.
2. Tanü ama rakzükrakter bulua mali asü, saka auerbo tetsür tebur tanur tain ajak liasü. Jangbong nung jang auyar shi takong ango takong ajak aküper alu nung mersü, züngi ajak aonger ta liasü. Kena auer ken yamaisa tenshia aru.

Kidang mungli jangyala

Len-a oali wadangbang nung mersü aongla.

Ano tzüma lima auyababo Aor sobaliba nung auer ta maja. Anungji bazari alubaji langkabosa auyatsü nükjidong azüa miima tepseta chitsü, karibo nashia auyali ta lia aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tsüngrem atalaba ken o nung tai tonglokja alir Khristan ana chiok



Adil Babar aser Simon Nadeem na den tena atema ken o jembitsürtem noksa nung angur.

Lahore, July 11, 2025 (Agencies): Lahore nung aliba court kati tamalen Tsüngrem atalaba ken o nung tai tonglokja alir tainlonglong Khristan ana chiokogo.

2023 küm May ita nung Adil Babar aser Simon Nadeem na arrshi küm 18 aser 14 dang liasü. Tangbo Babar arrshi küm 20 aser Nadeem arrshi küm 16 lir. Kiyong nung tilateri mangatettep ka adokba nungi tena nem tai tonglokja liasü.

July 8, 2025 nü Lahore nung aliba Magistrate Sohail Rafique of Cantt Courts-i Tsüngrem atalaba ken o nung tenapronglai maitsüi chiokogo.

Khristan lanur ana atemaji ken o jembitsür Supreme Court Advocate Naseeb Anjum-i court obendangji pelaa agizük.

2023 küm May 18 nü mangatettep tilaka adoka liasü. Adil Babar tebu, Babar Sandhu Masih-i ashiba agi, Lahore yimti

kübok Qurban Lines kiyong nung Babar aser Nadeem na kima asayaba mapang nung kiyong nung alir Muslim nunger, Zahid Sohail-i, lanur ana jagi ainkar Muhammad mezüngmeshi, ta tai tonglokja liasü.

Tenük kuli meliaka iba aonungji police-i par ki mita aruba sülen tebur anapronglaji apu aser Sections 295-C aser 298-A nung ajemdaker tena anema ken o benok. Iba ozüing kübok aibelenertem nem tasüba temerenshi agütsütsü akok mesüra taküm piyong tepuokdak ayutsü akok.

Advocate Anjum-i, Criminal Procedure Code nung Section 196 kübok provincial sorkar dang nungi jelia temelaba makai Section 295-A kübok ken o angadangtsü makok, aser ibayongji court-i ken o angadangbaji tim masü ta melunga liasü, ta metetdaksü.

Lanur ana nem tai tongloktsüba sülen kibong anapronglaji tetsübu nung iba tesem nungjagi aienشيا liasü.

"Tang tatalokba nung ajemdaker inyakyim latetshitsü nüngdak, kechiyong tai tonglokja tai maket nisung aika küm aika tepuokdak alitsü mesüra atsüka alitsüsa akümer," ta Anjum-isa metetdaksü.

Pakistan nung Khristantem densema minorities anema mangyangtsü asoshi Tsüngrem atalaba ozüing kübok tiyazü nung tai tongloktsü.

2024 küm kija nunga Pakistan nung Tsüngrem atalaba ken o 344 benoka liasü, ta Centre for Social Justice-i metetdaksü.

Adil Babar aser Simon Nadeem na chiokba ajanga tesünep terabo nguogo, ajisüaka iba ya tatem masü, kechiyong parnok maneni tetsübu nung dang alitsü.

Indonesia nung Tenla ki tasen asüba anema Muslim nungertemi longkak ait



Indonesia nung Batak Karo Protestant Church (GBKP)-i Tenla ki tasen asüba anema Muslim nungertemi longkak aitdang tangokba noksa nung angur.

July 11, 2025: July 5 nü Indonesia kübok Depok yimti nung Batak Karo Protestant Church (GBKP)-i Tenla ki tasen asütsü atema foundation lung azüingba sülen Tenla ki kimong anasaji Muslim nungertem aika adenshir longkak ait.

Kali Baru yimdak Community Empowerment Institute (LPM) lenir, Rudi Ardiansah-i, Tenla ki asüba anema nokdakba ya Muslim nungertem den tongtepratep

masüba agi lir, ta ashi.

Marturia Gereja GBKP Runggun Stuiod Alam Depok lenir, Zetsplayrs Tarigan-i, Tenla ki asütsü atema March 4 nü 'building permit' ngua liasü, ta metetdaksü.

Foundation lung azüingtsü anogo ana jelia Arogo lenirtemi yimdak lenirtem aser district lenirtem ajurua Tenla ki asü tenzüksü atema jembia liasü aser lenirtem dangji yimdaklirtem nem-a iba osangji metetdakjang ta mepishia liasü.

Arogo lenirtemisa parnoki Arogo kimong shilem kabo yim lendi atema tenla agütsütsü, ta sangdonger liasü.

Tarigan-i, "Sub-district office nung senden amenba mapang nung onoki building permit densema kulikaket ajak renema aliba metetdaksü. Iba dak alia onoki yimdak nisung shia ajuruabo iba osangji metetdaksütsü tasak, ibayongji lenirtem nem ang iba osangji metetdakja liasü," ta ashi.

Tarigan-i, Arogoi nüngdakba maparen ajak jelia inyakogo aser lateta aliba ama yimdaklir shilem 60 dak temai melunger, Arogo tenüing nung ali certificate nguogo aser Interfaith Harmony Forum (FKUB) nungia temelaba nguogo, metetdaksü.

Indonesia kübok region balala nung Muslim nungertemi Khristantem Tenla ki tasen asüba anema nokdaker, aser ibaji ajanga yimsü balala amangertem tsüingda tesünep raksar.

ANOGO ABEN TSÜNGREM DEN

Merüktetba jenjang tulu

"Ano, ozüing tasen koba pa dak aser nenok dak ochi lir, aji nenok dangi zülur; Kechiaser am Mangji süitemdagi, aser tang atangji tesangwaji yadagi" (T.Ken 51:8).

Temenen nungi, merükteta alitsübaji temela masü. Tsüngremi kechi inyaksü aji temulung nung yuang. Temeneni sentsü adokdaksür, memerüki kümdaksür aser tashidak adokdaksür, aser aji Yisu Khrista azü ajanga dang atsütetta indoktsü akok. Asenok ajak teti asoshi asütsü langa liasü, saka Pa asenok melena asü. Asenok dak kechi langa lir aji magütsübaji Tsüngrem taochiyong lir; taochiji asen dak malangba asenok nem agütsüba lir.

Kodang asenoki asen menen nangzükdir, asenok melen Yisu Khrista Tsüngrem tsüngdang noktaker (1 Yn. 2). Pa asenok asoshi pukümer lir. Kodang nai temenen menar, nai kibong anema masü; nai kümtetdakba shiba na atema asü pa anema menar, Pa yirur, na atema kotak nung ne melen chuba menden matsüngdang noktaker. Kar asüba ajanga dang temenen shidoktet, aser ibaji jenjang tulu. Temenen memenatsü asoshi ibai tajungshiba tulu.

Na kümzüka lira, na tatok agüja lira temenen dang nai sentsü tsüa aliba aidoktsür. Tsüngremi ne menen zülua mayur ta bilemtetang- saka Pai ne mapa zülutena ayur, aser nai Pa tenzüksü tashi ajak ajemdaksür ta tamadok.

Tsüngremi temenen temenen merüktettsübaji teti melaa dang lir ta tebilem. Tatokbaji jenjang tasak agi ali aji Yisu Khrista zü. Ne dangi tatidangba arudang ya bilemtetang.

Khrista osang proktsü atema Church of England-i sen million 30 agütsü

July 11, 2025: Church of England (CoFE)-i Khrista osangtajung proktsü atema diocese pezü nem pound sen million 30 agütsü.

Sen million 30 nungjagi shilem tesadang nungi teimbaka (million 17.8) Diocese of Birmingham nem agütsü. Senotsü lezmzüksüba ajanga item yimti pezü nung Arogotem asüingsashiba nung yaritsü aser aika Khrista dangi anir arutsü.

Iba dak alia yimti kübok kiyong tasen ka nung Tenla ki asütsü atema-a senotsü lezmzüksü.

Birmingham nung Bishop, Michael Volland-i, "Tang senotsü agütsüba ajanga ozü diocese-i Birmingham nung aliba Arogotem yaritetsü. Tamang jenjang indaksütsü aser Khrista temeim lemsateptsü atema item senotsü amshitsü," ta metetdaksü.

"Lanurtem aser lenirtem dak rangloker inyaksü aser ibaji ajanga Tsüngremer yimli atema

süngjang tajung tangtsütsü ni sarasademsr," ta paisa metetdaksü.

CoFE-i Diocese of Liverpool nem-a sen million 6.2 agütsüogo. Küm asem tsüingda diocese-i Arogo tasen yangertsüba aser youth ministry densema project balala atema senji amshitsü.

Liverpool Bishop Ruth Worsley-i, "Taoba hopta kija nunga Wigan nung lanur 27-i Khrista sülen anidaksü atema telemtetba agiogo. Tang senotsü teyari agütsüba ya ajanga diocese nung mission wadang aser ministry yangertsü, iba denji külemi lanurtem tamang jenjang ina Arogo aser diocese nung parnok ola angashitsü," ta ashi. Church of England-i Diocese of Chichester nem sen million 1.9 aser Diocese of Salisbury nem sen million 1.6 agütsü. Diocese ana jagia senotsüji mission mapa aser Arogotem asentenshitsü atema amshitsü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tepzüik

- (v) süng agi züka yokba (strike down)
* Aluyimertemi süng agi azüngken tepzüik.

Tepzüino

- (n) wara komo telongtena adokba (boil in skin, pus-filled bump)
* Temang nung tepzüino adokba agi shirangdaksür.

OLONG PAITEP # 7206

								1	
2		3			4				
5				6			7		8
9			10						
		11						12	
							13		
14	15				16				
			17						

TIPIEN

2. Tetendangba
6. Ashiba metet
9. Asen / Saklok
11. Acha-ayanger
13. Tilutep
14. Yimli sayuang ta asüngdang
17. Tetezü aketba pungmang

LANGTSÜNGLEN

1. As _ _ _ _ nshi
3. Putep
4. Tashi balaka
5. Iba küm
7. Alima nung malir dang ajaba
8. Komo temaitsü
10. Tapok
12. Tamajung aküm
15. S _ _ _ _üwangshi
16. Jenjang aketba merang

OLONG PAITEP # 7205 TELANGZÜBA

TIPIEN :

1. Anatsü, 3. Oshi, 5. Amena, 8. Shin,
9. Temeshi, 10. Asen 11. Jaksü,
12. Aika, 13. Takong.

LANGTSÜNGLEN :

1. Anüngdang, 2. Temenen,
4. Senshi, 6. Nehemia, 7. Tenükjang,
8. Shitsük, 9. Tenzük

NAI-A YA METETTER MA



Ajaki kanga sapua reprangba "Nacho Libre" movie ya Mexico nungér Catholic putir Sergio Gutiérrez Benítez taküm otsü ajanga ajungmesoba movie ka lir, shibai pa indang orphanage achaayangtsü atema mask semer miima wrestling asaya liasü. Pai Fray Tormenta ("Friar Storm") tenung nung pa kübok aliba tanur tem anepalutsü atema sen aazüktsü asoshi küm 23 dak tema wrestling asaya liasü. Iba movie nung Jack Black-i tongtibang shilem agir.

केनरा बैंक Canara Bank
KIOJEN AYOKTSÜ
SANGDONG

SPECIALIZED ASSET RECOVERY MANAGEMENT BRANCH
2nd Floor, Dee Bee Grande, 6 Mile, Panjabari Road, Guwahati-781022, E-mail- cb7259@canarabank.com

Securitisation and Reconstruction of Financial Assets and Enforcement of Security Interest Act, 2002 aser Rules 8(6) of the Security Interest (Enforcement) Rules, 2002 kübok kiojen E-auction asütsü sangdong.		
Public dang, talisa tsünglanglen shia aliba sen apur (tem) aser Guarantor (tem) dang ya sangdonger, Secured Creditor dang mortgaged süa aliba tsünglanglen shia aliba kiojen ya Canara Bank nung Authorised Officer-i agiadokogo aser ibaji Canara Bank Branch-i sen apur & Guarantor dang nungi sentsüh alangzüktsü atema 29.07.2025 anogo nung kiojenji "Kong aliar yamaji" aser "Yangji aliba ajak" basis nung ayoktsü. Earnest Money Deposit (EMD) ji 28.07.2025 anogo nikongdang 4:00 ako tashi nung mesüra iba anogo matongdang asütsü. Auction ji website: https://baanknet.com/ ajanga "Online E-auctioning" asütsü. Auction anogo aser mapang: 29.07.2025 anogo nung anüngdang 11:00 ako nungi nikongdang 01:00 ako tashi (Ayokba maparen metembang tashi minute pongungu (5) asülangtsü). Branch, sen apur/guarantor, liability, kiojen osang aser EMD, reserve price osang tejangja:		
(A) Secured Creditor/Branch Tenüing aser Address (B) Sen apur Borrower / Partner / Guarantor tenüing	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
(A) Canara Bank, Specialised ARM Branch, Guwahati 2nd Floor, Dee Bee Grande, Panjabari Road, Six Mile, Guwahati- 781022 (B) Borrower / Partner / Guarantor: Shiniho Kakheto Jakhalu S/o Shiniho, Marble and Granite House, Purana Bazaar, Kohima Road, Dimapur, Nagaland, PIN- 797112	Revenue Circle- Dimapur, Dist.- Dimapur, Nagaland kübok Thilixu, 3rd Mile, Block- IV, Bye Lane 5 nung Mr. Shiniho Kakheto Jakhalu tenüing nung aliba ali tasazük 1 Bigha 02 Katha 10 Lechas (200ft * 180ft = 36000.00 Sqft) As per land allotment order SI. No. 90 dated 25.05.2012 Bounded as under:- North: Approach Road, South: Fishery, East: Paddy Field, West: Holiheli.	(A) 80.55 Lakh (B) 103.00 Lakh (C) 10.30 Lakh (D) 0.50 Lakh
Iba sale telatetbatem aser osang tejangjaji Canara Bank indang website (www.canarabank.com) nung link "E-Auction" nung angutsü mesüra mapa inyakba anogotem nung office mapang yangi tongtepratepang- Branch Head of Specialized ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati, PIN- 781022, Contact No. +91-9971343295. Date: 07.07.2025, Place: Guwahati Authorised Officer, CANARA BANK		

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA

DHFV-3/VACANCIES/DRV/DTE/ 19-20

Dated, Kohima, the July 2025

CORRIGENDUM

With reference to the Departmental Advertisement NO.DHFV-3/ VACANCIES/DRV/DTE/19-20/774-80/ Dated, Kohima, the 12th June 2025, due to technical issues the Admit Card will be issued w.e.f. 21st July to 28th July 2025 and not as notified earlier.

(DR. MERENINLA SENLEM)

Principal Director

Directorate of Health & Family Welfare

Nagaland: Kohima.

Assam sorkari süngolu temeket nung model school 80 lapoktsü: CM

Guwahati, Chiteni/July 11 (Agencies): Assam sorkari süngolu temeket nung ano model school 80 lapoktsü, ta Chief Minister Himanta Biswa Sarma-i Brehotibarnü metetdaksüogo.

Tea Garden Model School aser Adarsha Vidyalayas tem indang headmaster tem den sensaksmeba mapang iba osang ya sangdonga liasü.

Sarma-i ashiba agi, state nung süngolu 800 aliba nung model school 200 amenoktsü sorkar sentong aliba nung iba inyakyim ya shilem ka lir. 2022 küm November ita ibala mesükba school 118 atema nüngshilong azüngtsüogo, aser item school tem yabo joko inyaksangshi tenzüko.

Tang amenoka aliba school tem takok indang jembiba mapang Chief Minister-isa, ano ibala mesükba school 80 lapoktsü ta ashi. Pai, süngolu temeket nung aliba tesemtem nung lokti balala nungi kaketshirtem item school tem nung züngoksemtü koda tongtibang iba indang lemsatepa liasü.

Chief Minister-i ashiba agi, model school tem nung tesayurtem service aser infrastructure jenjang ajungkettsütsü sorkar bendanga agütsür lir. Pai, class 9 aser 10 atema-a mid-day meal scheme benoktsü atema sorkari asadangdar, koba tang tashibo calss 8 tashi atema dang lir.

Sorkarisa, education jenjang

tajungba kümdaksütsü atema smart board aser smart classroom facility tem agütsü sentong lir.

Maneni Sarma-i, model school tem nung tesayurtem kwi ali, kaketshirtem attendance koma aser pass percentages koma item ajak asadanga liasü.

State nung tang inyaksangshia aliba Adarsha Vidyalayas 57 dak sendakba nung Chief Minister-i ashiba agi, item institution tem ya kinük nung aliba tesemtem nung sempet aketba tanurtem anitettsü aser jenjang aketba kaket shisatsü agütsütsü atema lir. Paisa, item school tem jenjang ajungkettsütsü atema sorkari inyakdar, ta ashi.

BJP-i Mizoram Home Minister aitsü

Aizawl, Chiteni/July 11

(Agencies): State Home Minister K Sapdanga-i, Governor Lt Gen (Retd.) Vijay Kumar Singh dang Chakma Autonomous District Council (CADC) nung Governor's Rule benoktsü atema telemtetba agiba asadangshitsü atema mepeshiba atema Bharatiya Janata Party (BJP) Mizoram unit-i pa aitsüogo.

Yimden yimsüsüba tsütsü tamendakdak anokshiba ajanga council inyakyim nung tetsükdaksü adokba sülen Governor's Rule ya July 7 nü benoka liasü.

Home Minister-i osangbenertem den sensaksemba mapang, Governor-i telemtetba agiba ya state indang council of ministers-i benokba anema liasü, ta ashi. Minister temi Zoram People's Movement (ZPM) nem taruba executive committee tentetdaksütsü shia liasü. ZMP-i menden 20 nungi

16 koka lir.

Osangbenertem den sensaksemba mapang BJP National Minority Morcha Secretary Delson Notlia-i ashiba agi, Governor-i, Sixth Schedule kübok Paragraph 20BB nung pa nem tashi agüja aliba dak ajemdaker iba jenjang agiogo, koba ajanga pa nem Autonomous District Councils (ADCs) dak sendakba nung tashi balaka agüja lir.

Paisa, taoba mapanga Governor temia iba amala telemtetba agiogo, ta ashi.

Notlia-isa, Governor-i telemtetba agiba ya CADC nung alirtemi pelashishia agizükogo, ta ashi. Pai ashiba agi, temzüng ozüng anema inyaksangshi ta shia Governor aitsüba aser pai telemtetba agiba agintsü khangba ya tim masü.

Paisa, CADC nung lenirtem aiben melenshia arudar aser 2013 aser 2023 tsüngda lenirtem terben melenshiogo

aser 2023 küm election sülena anabenbo melenshiogo, ta ashi.

BJP-i ashiba agi, yimden yimsüsüba tsütsü tamendakdak anokshiba, senotsü shitak mamshiba aser ozüng alema nüburtem mapa nung aniokba densema ochi mashi inkayim balala aliba ajanga council inyaksangshi nung tetsükdaksü adokogo. Parnokisa, staff tem taoba ita pongu tashi itasen mangu ta ashi.

Central Young Chakma Association (CYCA), Central Mizoram Chakma Students Union (CMCSU), aser Central Chakma Mahila Samiti (CMS) nungeri taoba mapang Governor aser Chief Minister Lalduhoma na dang council loksaja ken o bushisüngdangtsü temepeshiba agütsüogo.

CADC ya Constitution Sixth Schedule dak ajemdaker 1972 küm Mizoram nung Chakma nung terenlok atema amenoka liasü.

ASEAN senden nung US-Russia

Ukraine nem US air defence systems agütsütsü: Trump

Kuala Lumpur, Chiteni/July 11 (Agencies): ASEAN foreign minister tem Kuala Lumpur nung senden amenba mapang Russia Foreign Minister Sergey Lavrov aser United States Secretary of State Marco Rubio ano ajurutepa Ukraine nung rara indang jembia liasü, ta Russia sorkar meyong TASS agency ajanga ashi.

Brehostibarnü tena ajurutema minute 50 senden amenba sülen ano Hokulbarnüa ajurutep.

Hokulbarnü jembishinüba indang osang tejangja temai madok, saka Rubio-i Brehostibarnü senden amenba sülen osangbener den jembidang Ukraine nung yimjung asoshi yimya balaka nungi inyaktepsü indang jembia ta ashi.

"Iba yagi yimjung alitsü ta ni meshitettsü, saka tir dangi bener aotsü concept ka lir," ta pai ashi.

Hokulbarnü Lavrov-i rara anentsü asoshi Kremlin tangatetba lemsatepogo ta ashi. "Onoki Ukraine indang jembia Tir (Donald) Trump den July 3 nü sensaksemba densema Tir (Vladimir) Putin tangatetba indang jembioogo," ta Lavrov-i ASEAN senden amentsü lia Russian media dang ashi.

Russia indang Ministry of Foreign Affairs ajanga sangdong ka nung ashiba agi, ketdangsür tem Ukraine indang aser Iran, Syria aser alima ken o balala kanga junga aser temulung rakpoka jembia, ta ashi.

Iba ya Washington aser Moscow tsüngta indang-indanga ajurutepa senden ishiben amenba rongnung ka alitsü, kechiaser linük ana tesendaktep mejungi lir. Ajisüaka Russia ketdangsür temi tesendaktep tamajungba makumer ta ashir.

"Moscow aser Washington tsüngta tesendaktep samaa aor ta ashiba nibo magizükteter. Tang US administration yagi 'zigzag' yimya nung inyaker. Aser aji onoki kanga khuret süa magir," ta Russia Deputy Foreign Minister Sergey Ryabkov-i osangbener dang ashi.

Taküm tsükla metembangdang US-Russia tsüngta mangatettep aliba bentettsü asoshi ano senden amentsü akok ta Ryabkov-i ashi.

Tesendaktep mejungi liaka Moscow aser Washington ano tarutsü nung jembishinü akatsü kishi sadema lapoka lir amai ajiteter. "Onok jembitar, aser aji tetenzüker. Ajisüaka ano kechi arutsü, yangji keta lir," ta Rubio-i ashi.

Rubio ya US Secretary of State akumba sülen tang mezügbuba Asia semdanger, aser kasa mapang pai Kuala Lumpur nung Hokulbarnü Chinese Foreign Minister Wang Yi ajurua liasü. Ibai tena ajurutepba mezügbuba alitsü aser Asia Pacific nung US-i par aliba jangiadaktsütsü merangba mapang ka nung tena ajurutep.

Rubio-i Wang Yi den jembishinü akaba ya kanga tajung liasü ta ashi aser mangatettep aliba indang hau ta agizük. Trump aser China Tir Xi Jinping tsüngta senden amentsü akok, saka anogo lateta mali, ta Rubio-i ashi.

US Secretary of State ya East Asia Summit aser ASEAN Regional Forum nung adener, kong Japan, China, Russia, Australia, India aser European Union tem densema tashi tulu aliba linüktem lungjemdaktsür.

US-China shishilempaba tesendaktep mejungi akumba mapang ka nung ketdangsürtem senden balala ya amener. Beijing-i Washington dang taruba ita nungi tariffs tanaben mebenoktsü tekum dangtsü

shia lir, kongtayang kepzüktepa tariffs shilem 100 dak tema meshia liasü.

China-isa global supply chains nung Beijing medendaktsütsü merangba linüktem danga tayang kepzüksü tekum dangtsü shia lir.

Rubio-i Malaysia semdangba ajanga US-i Asia nung asendenshir ranglokba sayur, aser Trump indang tariff tasa ajanga maneni alima mangbanger lir.

August 1 nungi Malaysia densema aser tembar tajung Japan aser South Korea linüktem dang import tariffs sashia meshitsü lir.

Washington-i iba mera ya "rebalance trade" nung shilem ka lir ta ashir, saka iba yagi US-i tesendaktep nung tashi itshitsü merangba linüktem nunga tetsükdaktsü ajurutsü, ta aikati ashir.

ASEAN foreign minister temi Hokulbarnü sangdong ka agütsüba nung, linük balala shishilempaba yimya nung ochishia, indang-indanga aser ajak shilem agia talenba makai inyaktsü tongtipang lir ta shia liasü.

"Iba atema tajunglen nungi partners ajunga den külemi inyaktsü temulungtetba nung lir," ta regional bloc indang foreign minister temi ashi.



Washington, Chiteni/July 11 (Agencies): United States Tir Donald Trump-i Ukraine asoshi NATO ajanga Patriot air defence systems densema nok-nü yoktsü ta ashi.

Trump-i NBC News dang, tezüngzüktep tasen ka kübok "asenoki NATO dangi Patriots yoktsü, aser Nato-i aji lemsatsütsü aser NATO-i nok-nü indang sen agütsütsü," ta ashi.

Ukraine Tir Volodymyr Zelenskyy-i Trump den sensaksem tajung kaogo aser talisa air defence systems mapang shidak nung tonga arutsü ta ashiba sülen Trump-i iba osang ya sangdong.

Taoba hopta Russia-i drone aser missile amshia Ukraine indang yimtitem tali amakba sülen pai Patriot systems 10 asüngdanga liasü, ta Zelenskyy-i ashi.

Brehostibarnü Rome nung jembidang, Germany-i Patriots ana atema aser Norway-i ka atema sen agütsütsü renema lir, aser danga European partners tema yaritsü renema lir, ta Ukraine leniri shia liasü.

Taoba hopta Russia Tir Vladimi Putin den phone ajanga jembiba sülen Trump-i rara tembangtsü asoshi terenlok maliba atema mepelar ta ashi aser Putin dak yimya tajung aliba tetetzü maka kumogo ta shia liasü.

NBC News den sensaksemba mapang, Trump-i Russia atema Hombarnü tongtipang sangdong ka agütsütsü ta ashi saka iba sangdong indang tejangja melemsatep.

"Ukraine dangi yokba nok-nü atema sen ajak NATO-i menoktsü. US densema züngsemtemi bendenba ajanga NATO-i agütsütsü," ta pai ashi.

Hokulbarnü US Secretary of State Marco Rubio-i osangbener den jembidang, pai Germany aser Spain densema linüktem dang tang aliba Patriot batteries kar agütsütsü shiogo, kechiaser itemji ang Ukraine tekeraba nung atongtsü, ta ashi.

"Asenoki asen NATO allies tem dang item nok-nü agütsütsü maneni ajungshia arur, kechiaser parnok stocks nung

itemji lir, iba sülen senotsü tezüngzüktep yanglutsü... aser parnoki temelen alitettsü."

Taoba hopta US defence department-i tongtipang nok-nü soita ayu, anungji Kyiv nung air defences ya ita ishika tsüngta agimatsü ta shisabolua liasü.

Parnoki soita ayuba nok-nü ya Patriot interceptor missiles aser precision artillery shells tem lir ta ashir.

Iba sülen tan hopta Ukraine dak drone jenti amshia amakba ajanga Trump-i nok-nü tasen yoktsü ta ashi. "Asenoki yoktsüla... Tang parnok dak kanga sashia amaker."

Zelenskyy-i item nok-nü maneni yoktsü ayongzüker aser Patriot systems ya "real protectors of life" lir ta ashi.

Mongulbar aonung Ukraine dak drones 728 agi amak aser Russia-i 1,000 junga amshia amaktsü tebilemba lir ta Ukraine tiri ashi.

Soviet-era S-300 surface-to-air missiles aser Western-made Nasams (National Advanced Surface-to-Air Missile System) den Patriots ya Ukraine mitkar asoshi "layered defence" lir.

Advanced rarar aser tracking aser high interception rate aliba ajanga Patriot ya alima nung air defence systems tajungtiba rongnung ka ta züngshir.

ALI AYOKER

AT NIHOTO VILLAGE
NEAR 4 LANE
PLOT AVAILABLE ANY
SIZE
Rate: Rs. 170/Sq. ft.
9612242850
7005386130

SANGDONGER

Under Order I Rule 8(2) of the Code of Civil Procedure, 1908
IN THE HIGH COURT OF
JUDICATURE AT BOMBAY
ORDINARY ORIGINAL CIVIL
JURISDICTION IN IT'S COMMERCIAL
DIVISION INTERIM APPLICATION NO.
(L) 11733 OF 2025

IN
COMMERCIAL SUIT NO. 45 OF 2025
Worldline ePayments India Pvt. Ltd.
...Plaintiff

Versus
State Bank of India & Ors
...Defendants

Tekalen shia aliba Plaintiff anema commercial suit ka Defendant(s) ajanga Bombay nung aliba High Court of Judicature nem **Commercial Suit No. 45 of 2025** ama benoka aliba **Civil Procedure Code, 1908 ("CPC")** indang Order I Rule 8 kübok iba sangdong agütsür. Hon'ble Bombay High Court ajanga iba totuyuba anogo 13th June 2025 (the said "Order") nung Plaintiff dang CPC indang Order I Rule 8 kübok public notice agütsütsü totuyuba agütsü.

Yamaji **Capital Protection Force Pvt. Ltd.** (hereinafter referred to as "**Falcon**") indang customers ajunga (kong nisung/tem, entity/tem, iba amala entities tenüng nung aliba nisungtem) dang iba sangdong ya agütsür, shirnoki invoice aser/mesüra bill discounting transactions facilitated via Falcon's platform /online services ajanga tenüng züluoka aser/mesüra shilem agia lir, parnok nem iba osang ya agütsür.

Hon'ble Bombay High Court ajanga tarutsü nung obendang magütsü tashi Falcon's platform / online services ajanga Falcon customers temi payment transactions kecha meinyaki alitsü Hon'ble Bombay High Court ajanga iba totuyuba agütsür. Iba ken o ajanga kingshiba Falcon customers ajunga dang ken o metembang tashi ata alitsü metetdaktsür.

Dated this 12th day of July, 2025.

Issued by:
Sujit Lahoti & Associates
Advocates, Bombay High Court.

भारतीय वायु सेना / INDIAN AIR FORCE

JOIN INDIAN AIR FORCE AS AN AIRMAN

INDIAN AIR FORCE AJANGA INDIAN/ GORKHA (A SUBJECT OF NEPAL) TEBUR CANDIDATES TEM IAF NUNG AIRMEN IN GROUP 'Y' (NON-TECHNICAL) MEDICAL ASSISTANT TRADE FOR AIRMEN INTAKE 02/2026 AMA INYAKTSÜ ATEMA SELECTION TEST ASOSHI ONLINE APPLICATION MESHIR

1.	Online Registration anogotem:	July 11, 2025 anüngdang 11:00 ako nungi July 31, 2025 aonung 11:00 ako tashi
2.	Online Examination dates:	September 25, 2025 nungi tenzüksü
3.	Marital Status and Date of Birth Block	3.1. Medical Assistant (10+2 candidates atema). Candidate ya kibong makum asütsüla aser July 02, 2005 aser July 2, 2009 tsüngta asor asütsüla (anogo anaprong dena). 3.2. Medical Assistant (Diploma/ B.Sc in Pharmacy candidates atema). Candidate ya kibong makum asütsüla aser July 02, 2002 aser July 2, 2007 tsüngta asor asütsüla (anogo anaprong dena). Kibong kumer aliba candidate ya July 02, 2002 aser July 02, 2005 tsüngta asor asütsüla (anogo anaprong dena)
4.	Education Qualification	4.1. Candidate ya Central, State aser UTs ajanga recognise süa aliba Education Boards nungi Physics, Chemistry, Biology aser English nung tajemba agi marks shilem 50 aser English nung marks shilem 50 nung 10+2/ Intermediate/ Equivalent Examination pass sür alitsüla. MESÜRA Central, State aser UTs ajanga recognise süa aliba Education Boards nungi non-vocational subjects i.e. Physics, Chemistry, Biology aser English nung küm ana vocational courseaggregate marks shilem 50 aser English nung marks shilem 50 nung pass sür alitsüla. 4.2. Candidate ya Physics, Chemistry, Biology aser English nung aggregate marks shilem 50 aser English nung shilem 50 nung Intermediate/ 10+2/ Equivalent Examination pass sür alitsüla. Iba den Diploma/ B.Sc in Pharmacy aggregate marks tajemba agi shilem 50 den State Pharmacy Council mesüra Pharmacy Council of India nungi registration tejangja alitsüla. Temetettsü-1. Central, State aser UTs ajanga recognise süa aliba Education Boards (for 10+2 or equivalent) dang melatsü. Temetettsü -2. 10+2/ Intermediate/ Equivalent/ Diploma/ B.Sc in Pharmacy indang marks sheet nung decimal masüadang agüja aliba aggregate percentage shidak mesüra pei Education Board indang özüng nung aliba ama bendenba dang agütsü (Tatishitsü agi 49.99% ya 49% ta agütsü aser 50% ta mamshitsü).
5.	Group & Trade	Airmen in Group 'Y' (Non-Technical) for Medical Assistant Trade only.
6.	Registration fee	Rs. 550/- plus GST

FOR DETAILED ADVERTISEMENT LOG ON TO WEB PORTAL www.airmenselection.cdac.in

CBC 10803/11/0007/2526

Osang tejangja atema QR code scan süang

Mezüngbuba Inter High School & Hr. Sec. School basketball tournament tenzükogo



Mokokchung, 11 July (TYO): Mezüngbuba Inter High School & Higher Secondary School Annual Basketball Tournament ka 10th July, 2025 nü yangi BAMD Basketball Court, Imkongmeren Sports Complex, Mokokchung nung tenzükogo. Iba asayamung ya Basketball Association of Mokokchung District (BAMD)-i ayongzüka akar.

Taküm iba asayamung nung Mokokchung district kübok School 9 nungi team 13-i shilem agia asayadar, item rongnung tetsür team 4 aser tebur team 9 lir. Takoker nem senpet running trophy den sen senpettsütsü. Iba den ano tebur/tetsür na prongla Most Valuable Player aser Most

Promising Player shimtetsü, ta tayongertemi metetdaksüogo.

Iba asayamung lapoktsür Mokokchung DEO, Sentinenla-i jembidang, taoba mapangbo "Catch Them Young" ta sür tournament ka sa asaya-a aru, aser iba nungji school aikadi shilem agia liasü. Iba mapang asaya balala rongnung basketball ya-a kanga nüngtugu süa asayaba bilemteter, aser basketball asayaba ajanga medemer-medemsor karbo jenjang tajung ajangzükteta liasü, ta metetdaksü.

Tesüiba mapang "catch them young" tournament akadang tejangraba aser tetoktepba tanelaji balaka liasü, saka tanü iba jangrabangraba

aser Mokokchung nung basketball tournament asayaba küm talangka mangashi liasü, saka tanü iba basketball court yangluba sülen lanurtem aika kanga jangrabangra asayabangua kanga pela-a bilemer, ta lai ashi.

Iba ya asayamung ka dang masü saka ya lanur atema pei sempet saltsü sabang tajung ka lir, BAMD-i iba asayamung ayongba asoshi pelar ta lai tayonger nem tenüngsang agütsü. Ibai saisabong mung ka akaba dang masü saka school balala nungi ka kadi ka metettepa lungjemtsü maongka angur aser tetoktepba nela renlokdahtsür, ta laisa ashi.

Saisabong ya takok angutsü atema dangbo masü, yangi tazüokba, merangba, tsüngkang medem (team work), kümli aser ano tapu aika angazüker, ta lai ashi. Pei school kisüng atema masü tarutsü pei jenjang ajungkettsü atema aser Mokokchung district nem konang bener arutsütsü nükla yur asayatsü laisa ayongzüker.

Asayamung tenzükamezüng asaya Eden Academy aser Government High School, Changki na asayaba, Eden Academy-i 38-12 points agi akok. Iba asayamung ya 12th July, 2025 Honibarnü tashi asaya-a amungtsü.

Pongen kidongi HSLC nung takok ... (Tapak 2 nungi)

Tanü iba sentong nung tajungshi o jembir Dr. Kilangwabang Pongeneri jembidang, takok yagi ola adoker ta asüba tanü ama dang ajar. Tanü nenoki takok anguba yong alimai nenok tushir. Anungji, ya tetenzüker sür nükjidong matalok tashi meranga azüngtsü aser tangari "hau" ta shitetsüsa jenjang yanglutsü ayongzüker.

Tang nungi tenzükur küm 10 tsüngta nung mesüra majungdang ner aseme jenjang ka mesüra kabosa ajangzüker arutsü imlar. Nenok ajanga Pongen kidong ajungkettsütsü teimla tulu lir, anungji, tang koma lir iba amai taküm meraksai jenjang tajung ajangzüksü merangang, ta pai ajungshia liasü.

Alima nung ya merangaka ataloktsü asü mataloktsüa'r ashitsü makokba aika lir, saka langka kabo ataloktsübasa, aji kechi? ta sürabang, "temelenshiba yabo arulanglang", aser "shiba alima melenshiba den tsüngkang medema aor parnokji aotsü", aser "shirnoki alima melenshiba sülen maor parnokji samatsü", "Alima melenshiba den tapet shirnoki oteter parnokji tokolok

techira asür", ta paisha tashitemeteteri shinba o kar atishia metetdaksü.

Jenjang kasa nung dang lidi ta asüba tanü tangatetba tai lir, joko asenoka alima ainba den lirumedema aintsüba tensai akanger. Tanübo meranga züngang ("study hard") ta masü, tensa den apet yakyaka/shisa ka bushiang ("study smart"/ "study wise") ta jembir, anungji, tensa den sütepa azüngtsü asoshi paisha ajungshi.

Tanü alima ya kanga kera aor, anungji, mapang ya kanga tongtibang lir. Joko alima nung ya shinga azünga malir. Mapa ka mesüra ka nungbosa amdaka lir. Tanü asen lokti nung senden (meeting) agiba yimya ya mapang telatet ka makai agiteper, anungji, tang nungibo ghonda telatet ka yur aginung junger, ta paisha melenshidaktsünüba ka lemsatet.

Tanü alima rongsenren ya shisatsü nung amendaker aor (knowledge based economy), shir lima nung tokolok techira/shisakar ali par limaji takar akümer, anungji, asenoka kakat azüngba aser shisatsü bushiba wadang nung ya temulung agütsütsüba kanga tongtibang

lir, ta paisha ashi.

Lokti senden balala nung tesüiba aser tanü tensa indang otsü jembitsüjia nüngdak saka tarutsü nung koma asütsü aser kechi inyak nung ajungtsü ta asüba nung mapang teimba intok nung tajungba asütsü, ta paisha lemsatet. Tanü asen lima tebilemstü aika lir - lenmang majungba, tzü agi anüngakongba, healthcare facility aser ano aika, anungji, itemji koma tajungba akümtsü/renloktsü ta asüba nung agütsütsü paisha ayongzüker.

Iba sentong nung TSPM vice president - Imtituab Pongen menden liasü. TSPM president - Guru Bendangwati Pongeneri tayongzüka o tulu bener arua tesentepertem ayongzüker. ETA convenor Wb. Rongsensashi Pongeni tetushi agütsüba mapang ketdangüsü agi. Iba sentong Sungkamen Baptist Arogo nung Music Director - Moasunep Pongen den temoatsü meshia sarasademertenzük aser taoba TSPM president - Wb. Sakuwati Pongeni tenüngsang agüja sarasademertembang. Iba sentong nung TSPM kübok bendang balala nungi adenshia kanga meraketa agia liasü.

1buba Nagaland Pickleball Open ayonger

Dimapur, Chiteni/ July 11 (TYO): Nagaland Pickleball Association (NPA)-i, 1buba Nagaland Pickleball Open ayongzüka metetdaksüogo.

Iba asayamung ya July 13 nü nungi tenzükur Aiko Greens, Dimapur nung asayatsü. Iba asayamung nung tebur tarep asaya aser tarep temeyoktep asaya asayatsü, koba

2025 küm March 27 nü NPA amenokba sülen state ajunga nung pickleball asaya ajungketba nung alizüng tongtibang ka tongtetba asütsü.

Asayamung metenzük tsüngda International Pickleball asayar aser coach Dilip Mohanty-i July 12, Honibarnü nikongtsütsü 6 ako nungi 8 ako tashi special training clinic ka ayongzüka agitsü.

Mohanty ya PPR (Professional Pickleball Registry) India Director aser Certified PPR Coaches Tutor (USA) ka lir,



aser pai asayartem tasa arangteshitsütsü atema tajangshiba aser tasa tajung bener arutsü. Asayartem dang iba asayamung nung shilem agitsü atema tenüng züngksemstü jaokogo aser media partner temia NPA den tongteprateptetsü, ta metetdaksüogo.

Association-isa, asayamung nung shilem agitsü pur ajaki kanga junga asayatsü imlaja ataba den Nagaland nung pickleball asaya renloka yoktsü atema yongyaseta ataba lemsatetpa liasü.

Odei Onaindia-i club toktsüogo

Chiteni/July 11, 2025 (Agencies): Indian Super League (ISL) club FC Goa-i, Spain nunger centre-back aser club captain Odei Onaindia-i club toktsüba sangdongogo.

Pai asaya kanga junga angatetba, anüng nung ball kanga junga asayatetba aser pressure asaya nung kanga süngjema asayatetba ajanga pa ya league nung temulung alemtsü aketba defender tem rongnung tajungtiba ka kümdaktsü.

Onaindia ya head coach Manolo Marquez den Hyderabad FC nungi anidaka arua FC Goa nung aden. Club nung pa Sandesh Jhingan den longjem aser tena senteper taoba season ana ISL nung FC Goa indang defence nung tongtibang shilem agiogo.

"Onok captain-i takokba tashi club atema ajak agütsüogo. Pai onok tola meraketa asem aser pa mulung ajunga agi asayaba den team takok dangi aniogo.

"Amatoktsü makokba küm ana tsüngda pai Gaur ka asütsü kechi aji asayaba moapu nung sayuogo. @onaindia.odei kanga pelar. Na tarutsü takok nung

aotsü imlaja atar," ta FC Goa sangdong ka ajanga metetdaksü.

Jhingan yiruba sülena Onaindia-i Nim Dorjee den longjem season nung tanungba asayatem asaya aser iba sülen taruba season nung kanga takok ngua asaya liasü.

Onaindia ya back nung kanga tashi tait liasü aser 2023-24 season nung FC Goa pur asaya teku nungi ti tashi nung goal ka danga mechi-i asayaba mapang pai tongtibang shilem agi. Regular season nung team tasembuba jenjang nung tembang, saka semifinal nung Mumbai City FC-i tsükdaktsü.

Taruba season nunga pa lenisüba nung Goa team defence kanga tashi ita asaya liasü. League asaya nung FC Goa pur tanabuba jenjang nung tembang saka semifinal nung Bengaluru FC makok.

Tamakok ana tashi anguba sülen FC Goa puri 2025 küm Kalinga Super Cup nung Jamshedpur FC koka iba asayamung koka liasü. Onaindia lenisüba nung par team iba asayamung tepeyong nung goal ana dang chia liasü.

BILEMDANGANG

"Tamang agiang tesangwaji shisangdaksür."